

四庫全書

集部

欽定四庫全書

集部

東里文集卷十九

二十九

詳校官檢討

臣

羅國俊

中書

臣劉源溥覆勘

總校官進士

臣楊懋珩

校對官主事

臣張培

謄錄監生

臣華春芳

謄錄監生

臣張永浙

欽定四庫全書

東里文集卷十九

明 楊士奇 撰

墓誌銘

故資善大夫兵部尚書張公墓志銘

公諱本字致中姓張氏山東東阿人曾祖欽祖誠考從
善其先世見余所作其考墓志公洪武中自國子生擢
揚州府江都知縣陞揚州知府遂陞江西布政司左叅
政召為工部左侍郎坐累謫交趾還為刑部右侍郎陞

南京兵部尚書兼都察院事召爲行在兵部尚書兼太子賓客兼戶部事公少勤學治毛氏詩爲人直諒通敏有器識初在江都治其縣有法豪猾斂肅雖上官素名悍暴者不得下擾江都之民安之太宗皇帝義兵及境衛府皆已歸附公猶率民治守具母夫人曰此天命也可違天以禍人乎遂率民耆老詣軍門朝內難平陞知府進叅政賜白金文綺是時江西唐琮在都司劉辰在布政司周觀政爲按察使三人皆負勁氣不相下琮觀

政尤縱私無忌憚事連軍民者即各持說務已勝不復
揆理有積滯數月不決者公至斷斷持正且溫辭和氣
以導之久而三人者皆惟公言之聽吏弊素甚公每事
躬理吏無容奸聲譽頓起遠郡邑民事當貳佐躬臨視
者衆或憚行輒自請行所過民多德之爲工部職務叢
脞旦暮在公悉心殫慮寢有條理在刑部奉命督北京
河運至濟寧而病朝廷聞之遣中官挾醫馳視并賜藥
及貂裘竣事還益持敬慎議獄必究情疑者處之率厚

數發奸擿伏奇中而紀綱秩秩仁宗皇帝初嗣大位重
南京根本之地曰張本特立不阿首進公南京兵部尚
書兼都察院事明年被召入見言國家大計遂留行在
兵部毅然以革弊舉廢爲務皇上嗣位知公忠直可任
所言多見聽納高煦反車駕親征罪人既得命公撫輯
其衆而錄其餘黨兵政久弊姦人以貨脫伍籍而援平
民實伍者遠邇一轍公言於上擇廷臣四出清理悉用
釐正於釐正他弊尤多賜勅獎諭命兼太子賓客賜白

金文綺鞍馬遂命兼戶部事戶部政紀尤弛公夙夜不
懈講求其故蠲其積弊舉其墜典凡上利國家下利民
生者靡不盡心事日益就緒宣德六年正月六日得疾
又明年訃聞上深悼惜遣禮部尚書胡濙賜祭遣中官
賜賻鈔三萬緡勅工部營喪塋戶部復其家比葬復遣
官賜祭鄉大夫士之賢者皆走哭弔致奠祭又相與歎
曰一世都高位享厚祿而能任國事如家事如張公者
幾人天胡奪張公之速哉公廉介有守其心未嘗斯須

不在國事剛果嫉惡於治姦宄鮮所寬假而禮賢敬儒尤厚春秋六十有五而卒卒之日家無餘貲亦可以觀其平素矣以公貴祖若考皆贈資善大夫兵部尚書祖妣李妣丘皆贈夫人配王封夫人子男二璘環女二長嫁盧春次嫁祁慶孫男三承祖繼宗如意保公塋以卒之歲某月某日墓在東阿先塋之次璘等以右通政徐琦所狀事行來請銘余與公兩京交好殆三十年又悉其江西之政蓋琦知公不若余知之深也銘曰

崇秩重祿偉公與卿魏冠褒衣蟬聯在廷孰知張公經國
如家夙夜弗遑勞思孔多何以益上何以益下曰予時職
其敢遑暇焯焯成績在公多有倚注方隆公止下壽庶貞
之操公正之施賢人之喪善人之思

陳思孝墓志銘

永樂甲申詔吏部簡士之能書者儲翰林給廩祿使進
其能將用之清密之地長樂陳登思孝以篆籀最先至
時吳中滕用亨待詔翰林工篆籀自視天下無愈已者

且恃春秋高輕後進往往折屈之稠人廣坐中思孝初至謹默譙下用亨連三日折之文淵閣六卿大臣皆在旁眎不可耐思孝怡然從容進曰登幸辱在此親教益愚陋願有所質就用亨語之戾許叔重者十數事相辨難思孝道許氏說娓娓皆用亨素所忍者用亨乃始默然歛鋒鏑不復自矜大思孝聲譽遂起時四明王尹實篆書擅名海內至考據精博亦推讓思孝云思孝於六書本原精考詳究志篤而力勤周秦以來二千年間其

石刻有在而委棄山顛水厓荒蕪瓦礫之墟者皆深求而必得之雖殘缺剝落歲月氏名無可考然審度其出某代某人十率中七八其收畜之富蓋歐陽文忠趙明誠之後所僅見也思孝初舉才學為湖廣羅田縣丞數月改浙江蘭溪丞月餘又改江西浮梁丞所至視民如子務寬恤之而明決以革奸弊在浮梁時房安為江西按察使以嚴憚屬吏獨禮遇思孝歲餘丁內艱去服闋遂選入翰林仍給縣丞祿歷十年擢中書舍人朝廷

大題扁率出其手而四方求者無虛日未嘗有厭倦意
又十年給告歸歸而疾作又四年還京還兩月疾復作
遂卒宣德戊申七月十五日也享年六十有七其為人
博學謹禮耿介負直氣是是非非率依義不肯陰阿假
借雖屢以是召怨不悔雖貧薄而勇於爲義曰人道當
然也其先居光之固始唐季從王審知入閩家福唐之
玉融數世徙長樂宋福清令世榮思孝高祖也曾祖宗
振祖嗣朋父仲進洪武中歷宜陽韓城兩縣丞陞江山

知縣皆有惠政江山民尤德之母某氏其配高氏先卒
其子男二中書同甫女一嫁丘汝中孫男一維禎女四
思孝所用心六書今得其傳者吏部郎中盱江程南雲
於是中書奉史官陳叔剛所具狀介南雲求余為銘將
歸而納諸墓余雅厚思孝義不可辭銘曰

六書之教周典傳史籀所作時同文逮於秦斯古尚存
邈趨簡便降隸分東都沿晉騫草真傳葩逐葉失本根
唐冰復古稽前聞後有作者承餘熏思孝之作沂探源

竒迹密義窮寒溫涵積而放波瀾翻落手揮霍風雨奔
交金屈鐵雕璵璠雄渾傑特時絕倫大書深刻盤繡雲
嗚呼思孝今九原有偉其著垂不刊

故少師吏部尚書贈特進光祿大夫太師謚忠
定憲公墓志銘

宣德十年正月十有五日少師吏部尚書憲公薨於位
先四日以疾聞上遣太監范弘以醫來視賜鈔萬緡明
日范太監以衆醫偕來又明日疾革范復來問所欲言

對曰陛下初嗣大寶義獨寡祐不能効分寸裨益然區區犬馬之誠所望於聖明者惟敬守洪武成憲始終不渝耳言已而絕訃聞上深悼歎屬時國有大事悉停諸祀特賜鈔萬緡勅工部治喪塋贈公特進光祿大夫太師謚忠定遣某官某賜祭而官其長子英英等奉櫬歸塋有日求余爲銘余與公同朝三十有五年而事仁宗皇帝自登儲至大位始終皆陪公公國家老成人所以啟益士奇蓋多不敢辭蹇氏世家重慶之巴縣宋以來

多顯仕自公高曾而下始隱居不出曾祖繼祖妣至氏
祖均壽妣雍氏考源斌妣胡氏繼羅氏以公貴贈曾祖
祖考皆榮祿大夫少師吏部尚書曾祖妣祖妣妣皆夫
人公諱義字宜之生而岐嶷長端重不好弄而嗜學弗
懈始從里社師中書左丞殷哲時為郡守一見異之引
克郡學弟子員語其師曰是兒將來遠到非吾所及當
成就之而公不煩程督日益有進洪武甲子中四川鄉
試明年中禮部會試廷試賜同進士出身擢中書舍

人授徵仕郎見重太祖高皇帝每前奏事率稱旨而數見獎賚初名瑤一日奏事畢問汝蹇叔之後乎親灑宸翰書義字賜之以易舊名時丁羅夫人憂賜道里費且命馳驛歸蓋特恩云服闋仍舊職滿三載吏部奏當調特命終九載朝夕左右凡機密文字必以付公而小心敬慎久而愈篤建文中陞吏部右侍郎授嘉議大夫太宗文皇帝入正大統轉左侍郎數月陞吏部尚書授資善大夫時政令制度有非洪武之舊者詔悉復之公從

容爲上言損益貴適時宜間舉數事陳說本末文皇帝以公忠實悉從其言小人有譖公不忘建文者賴上聖明不聽有除官不得善地訴公不公者上皆斥之永樂二年冊仁宗皇帝爲皇太子命公爲詹事時師傅皆以勲臣兼之而輔導貴任文臣詹事蓋元僚也上欲有諭皇太子率諭詹事往導意公亦委曲周悉皇太子尤愛重公所言靡不信用滿三載陞資政大夫七年車駕巡守北京命皇太子監國中外庶務惟諸王及遠夷有奏

請詣行在餘悉啟聞處分公熟于典故達於政體孜孜無倦不
動聲色而事賴以濟賜誥以其官秩封贈二代滿九載賜勅有
秉心正直及淳良篤實裨益國家之褒數奉命兼禮部事雖職
務填委處之裕如十七年丁父喪歸上及皇太子皆遣官賜祭
皇太子贈賻尤厚有詔起復公詣北京謝上慰勞再三賜鈔千
緡遣中官護送歸南京明年從皇太子朝北京遂命公巡撫直
隸應天等府州問兵民休戚及文武吏之賢否而升黜之公謂
國家多事之際悉以法繩吏人將不勝特出其太甚者數人餘

多見寬假而兵民利弊當建革者具奏行之仁宗皇帝
初嗣位一切政議預者三四人而公居首進少保兼吏部
尚書二俸俱支賜冠服象笏及玉帶二遂進少傅又進少
師賜師傅之臣銀章各一其文曰繩愆糾繆公首被賜
上諭之曰朕有過舉卿即具疏用此封識進來蓋望公
等匡直也繼賜詔授榮祿大夫封贈三代及妻於公數
人詔詞上特增曰勿謂崇高而難入勿以有所從違而
或怠所以望公等者甚切也又念公侍從監國舊勞特

製褰忠貞印賜之而賜勅有以善翊君勞心焦思二十
餘年夷險一節之褒時修太宗皇帝實錄命公監脩宣
宗皇帝嗣位一切政議屬公數人如仁考之初繼奉命
監修仁宗皇帝實錄書成賜白金文綺鞍馬扈從征庶
人高煦還寵賚尤厚復從巡邊既還以公年老不欲煩
以有司之務賜勅曰卿事祖宗積効勤誠朕嗣統以來
尤資贊輔夙夜在念圖善始終蓋以卿春秋高尚典劇
司優老待賢禮非攸當況師保之重寅亮為職不煩庶

政乃副倚毗可輟吏部之務朝夕在朕左右相與討論
至理共寧邦家其專精神審思慮益致嘉猷用稱眷倚
老成之意繼賜銀章一其文曰忠厚寬弘益以褒德云
賜新第於文明門內寵錫渚加吏部言公歷少師九載
降勅褒諭仍賜宴禮部是歲生旦賜鈔萬緡廐馬一疋
今上嗣大位之日賜白金文綺是夕齋宿于公得疾越
五日竟不起享年七十有三公爲人沈深質實和厚簡
靜內有孝友之行事君有誠處人有量無所拂逆未嘗

輕涉一語傷物至於議法亦不苟爲包含必歸中正歷事
五朝凡五十年所履坦坦無一日顛躓之憂退朝之暇
手不釋卷貴而能謙富而能約上前所言未嘗退以語
人蓋天下有陰被其利者矣士奇嘗竊論之魯簡肅之
忠實不欺李文正之不爲傷人害物張忠定之不飾玩
好傅獻簡之遇人以誠范忠文之不設城府公蓋兼有
之矣元配劉氏繼張氏皆封夫人子男四長英次芳次
芸次荃英荃皆尚寶司丞荃先卒女二長適馬駿次適

李成孫男四霖震霑露女一公之塋以薨之歲某月日
墓在巴縣某鄉某原先塋之次銘曰

節乎蜀山浩乎蜀川孕精毓靈挺生偉人溫中穆外履夷蹈素皇
明麗天奮躍自下在帝左右秉恭與誠掌帝之制播告四方進
貳天官遂職冢宰簡用俊良往興至理帝命存隆俾輔
聖儲陳厥謀謨聖罔弗俞四紀在廷三翼升御肅肅師
臣秉王之度一念惟仁未矢不渝寅畏小心保終猶初
陰利逮人人則罔覺惟帝昭明褒詔有數嗚呼忠定維

國老成昌不慙遺翼我聖明生榮死哀死且不朽昭德
刊辭永告爾後

故資政大夫戶部尚書郭公墓志銘

宣德六年四月十一日資政大夫行在戶部尚書棠邑
郭公卒訃聞上悼歎賜祭命有司給舟歸喪且營葬事
公諱敷字仲厚姓郭氏其先自太原交城徙東昌棠邑
祖諱忠妣石氏考諱政寬妣侯氏繼馬氏郭世有善德
公自幼凝重端謹稍長游鄉校日勤講習已卓卓出倫

輩洪武癸酉以詩經中山東鄉試會試下第後擢戶部
廣西清吏司主事歲餘有賢聲陞衢州知府下車咨民
隱蠲弊興利脩學政務教化崇儒術禮賢行以表勸其
民賑恤無告郡俗貧死不能葬者焚屍沉之公相城東
得廢地百餘畝榜曰義阡令民貧死者悉葬是又為約
教民有急相資助民利賴之嘗歲旱公齋沐致禱雨立
降霑足蝗入境為災公自為文檄城隍神是夕大雨雷
電蝗盡死凡所禱輒應城西有淫祠歲四月軍民男女

聚謁祭祠下謹謹若狂公禁止之已而得風眩疾吏民
爭勸罷禁弗聽疾亦瘳同寮有私取民財者公雖不
面斥而義形於色其人頓首謝改過待之如初屬邑吏
爭濯磨自效公退所謀諸心發諸言未嘗不在民事所
秉正直襟宇坦明言出而民信令出而民從不俟程督
庶務畢舉舍內蠶箔嘗有叢絲類織成鞞帶修廣適度
郡人謂公仁政之應在衢七年政化大行坐累徵詣京
師耆老數百人伏闕奏乞留理官執不可耆老皆流涕

而退後廷臣有言公廉正不阿者召爲監察御史陞河南布政司左叅政無幾調陝西以公務留京師今禮部尚書胡公言其行於太宗皇帝曰郭敦有大臣體宜在左右即日召見以病弗克入遂遣御醫視疾疾愈入謝獎勞再三賜鈔襲衣明日陞禮部右侍郎兼太僕寺卿仁宗皇帝臨御進戶部左侍郎兼詹事府少詹事賜誥以其官贈祖若考而贈其祖妣妣皆泚人贈故室李封繼室林亦泚人宣德二年陞戶部尚書命項陝西歲餘

召還在戶部無敢一毫干以私者未幾得疾上聞之命
太醫往視數日竟不起春秋六十有二爲人純寔溫雅
事親愛敬無至隆寒盛暑不懈閨門之內儀度清肅聲
色未嘗留耳目公暇手不釋卷私居無惰容居官剛正
人莫能奪所至整飭綱紀盡誠撫卹不徐不亟吏畏民
懷冰蘖之操無遜古人雖官列六卿泊然布素身沒之
日家無餘貲豈非篤行君子者乎子男五祺禎禧禔祐
女一適肥鄉知縣楊翺孫男女皆六於是諸孤奉衛府長

史金寶所狀事行介禮部尚書胡公求塋銘噫爲行如
公銘其何愧銘曰

君子之德惟正故直惟公故碩惟澹故適于道之迪于
民之惻嗟乎郭公允脩衆好嗟乎斯銘無愧有道

東阿知縣貝君墓志銘

宣德元年十一月廿一日東阿知縣上虞貝秉彛卒自
寮屬下暨吏胥邑之耆老皆會哭至慟自邑至於遠鄉
民男女老壯素服奔走哭拜縣門之外者日數百人於

是其家無一緡之蓄其僚以下相與出貲治棺斂畢東
阿之民皆欲挽留塋之而其子不可曰幸奉治命必還
祔塋于鄉先塋其敢違哉於是東阿之民相率致詞於
兵部尚書張公曰自貝大夫治吾邑吾邑之人旦作暮
息各趨其所務無淪於遊惰壯者以時給徭賦老而弱
者佚於家爭奪之風息長少之分明無悍吏猾胥之迹
及門歲未嘗有水旱疫癘之憂皆貝大夫惠化所被也
安得復有若人者而爲吾邑哉今將歸塋矣公出吾東

阿而貴顯于時必能致顯人為貝大夫不朽之圖亦庶
幾釋吾儕之惓惓也公以告士奇士奇雖與秉彝平生
一再邂逅然嘗過東阿目睹其民所以愛戴之者矣夫
生而愛戴之沒而惓惓欲圖其不朽即古循吏何過焉
遂諾之明日公以秉彝之子益來請文刻幽堂之石按
翰林侍讀李時勉狀貝氏其先河南祥符人宋秘書少
監守亮從高宗南渡始家上虞四世至建康軍僉判欽
世生廣德軍教授襲慶又四世至元醫學教諭文忠東

彛曾祖也祖元凱父肅東彛諱恒以字行自幼有志卓
立好學不倦稍長喪其父能謹於禮而奉養祖及母及
撫諸小弱弟咸盡其心以詩經舉永樂甲申賜第二甲
進士出身初授湖廣邵陽知縣縣僻而俗險前之名能
治者率以嚴東彛寬馭之而導以禮義其民感化相戒
毋貽羞賢令於利一分不苟取歲餘以祖喪去官寮佐
以下致賻贈悉卻之而吏民不忍其去有流涕者祖喪
未終繼喪母謹塋祭之禮一如喪父服闋改東阿知縣

東阿當南北要衝素苦過使往還供給之費秉彛規措有方物具而不擾薄有挾私怨緣飾人死罪者秉彛曰盍以直報之簿愧而止隣邑盜劫人匿其贓古冢中塚傍耕民得之而邂逅被劫者識其故物執民訴官民不勝考掠竟引伏秉彛聞而疑之然非其所當理不得有爲會有商人過東阿被盜來訴秉彛併隣邑盜事以檄城隍神而嚴督譏察兵大索數日獲三十餘盜隣邑劫盜皆在耕民得免冤死民有兄弟爭競相告者曉以大

義使退而思之兄弟皆悔謝乞歸改過獄有殺人賊未
決而兩目俱盲秉彝就審之視其容色若甚戚焉者問
豈有冤乎賊曰罪誠當死無所冤但憂身死即宗祀無
繼遂命其妻入侍疾後賊死而妻有子嘗歲早躬禱之
雨立至間蝗引咎自責蝗遽散歲屢豐建議於朝請平
糴爲預脩計從之仍下其議旁近州縣通行之祀典壇
廟及學舍久毀于兵前之爲縣者率苟且行事秉彝率
丞簿出俸以倡邑人咸作新之有暇詣學進諸生與之

講說是正所業而月日程之令鄉社皆立學時循行田間觀民藝穫以驗勤惰邑西南有灤春夏潦水無所洩泛溢漫衍近灤之民恒廢耕秉彛相地將開渠納諸大清河而召民役之與其佐議薄持不可曰法不得擅役民秉彛曰以利之也有罪請獨加我不相及渠成得沃壤數千畝耕之卒亦無事旁邑流徙來歸者甚衆綏撫如子車駕征北邊命河南山東西民丁隨軍供饋餉郡邑各遣官率之憚行者往往爲規避計秉彛毅然曰天

子親征臣下可避勞耶即治裝就道民聞令行皆忻躍以從動息飲食與民同甘苦訖師旋東阿無一人失所者在官雖小物必思以及民營繕有餘棄廢鐵敗皮朽索故紙之類悉存之工匠閒暇令煮皮為膠鑄鐵為杵搗紙索為穰貯之庫會車駕巡幸北京勅使督建所次席殿所貯悉濟急用而民不費有薦其廉公明大體堪任風憲者徵命已下縣耆老百餘人詣闕乞留從之九載考績上京師時仁廟監國知其任東阿得民心特陞秩正六品俾復任民聞東吳復來踴躍

迎拜數十里嘗坐累罰役京師時有令官役滿即復任民競趨代其役凡三罰役民三代之不厭而愈力其得人如此東爨和厚樂易於物無忤而執守甚堅善飲酒既仕遂疏之勤於公務日中而食夜二鼓而寢盛寒暑不自逸率為常所著有文集若干卷其卒年五十有七娶張氏繼陸氏子男四益錫舉循女三皆幼孫男四嗚呼古之賢長民其民思慕之不已者多見於祠祀祠祀盖有不及百年而廢者矣如東阿之民於東爨必欲託諸不朽此其用意豈朝夕之謂哉為之

銘曰

桐鄉之祀廉愛以施蜀郡之祠興學以治貝君為阿二者無有民
用不忘視古有厚吏氏之銘從民志也後之長民庶其有歧也

故翰林檢討周君墓志銘

君子之仕也食其祿則思任其事雖位庠不敢忽宋韓
魏公登高科而滯瑯庫未嘗苟且職事徙開封推官理
事不倦暑月汗流浹背當時已知其公輔器蓋賢者事
君無不皆然今士之不樂檢束者往往目勤職為流俗

甚至詞垣翰苑以文事爲職亦有放曠散逸以自高者
士奇入翰林三十年同官之能勤其職余素所知者周
維翰其一焉維翰初爲典籍天下古今載籍皆儲文淵
閣歲久卷帙散亂簡編壞折維翰積其勞勤寒暑不懈
理殺脩壞蓋再歲完整秩然同官時惟陳壽克助維翰
他典籍不及也近歲翰林奉詔脩兩朝實錄維翰以檢
討爲纂修簡牘浩繁考閱纂述維翰所分治特叢脞其
事加倍同列而單心窮力無幾微厭怠意書垂成維翰病

病且困猶日在念慮既劇猶問史成何如言不及他事而卒維翰之卒也家貧同官相率出賻歸其喪於是其孤以禮部祠祭郎中鄭復言所具事狀乞葬銘周鄭世儒家曾祖諱允升元青田縣學諭祖諱道寧奉化州學正考諱原宗贈翰林檢討妣朱贈孺人維翰諱翰自少聰敏嗜學長益該博能文章永樂三年中浙江鄉試明年會試禮部中副榜當授教官不就會車駕臨太學獻賦稱旨尋詔禮部所選副榜士就廷覆試擢翰居首遂

奉命進學翰林預脩永樂大典七年除翰林典籍授迪
功佐郎歷三考陞檢討授從仕郎維翰性和易惇孝友
服用儉質能推所有以濟窮乏善交際不吝改過通數
學論人吉凶壽夭數奇中其平生所作詩文累帙其卒
以宣德四年八月十一日享年六十有四其塋以卒之
歲某月某日其配史氏宋忠定王六世孫封孺人子男
二益齋女二長已卒次嫁王冬孫男三勤慎某銘曰
為臣之義敬事為大凡古之人夙夜匪懈嗟嗟維翰克勤克

勵我銘其藏亦勵有位

故太醫士何彥澄墓志銘

醫者聖人以濟民于天死所謂仁術也近世業醫而能
察於陰陽表裏虛寔脉證之故者鮮矣或千百有什一
其庶幾焉則又脉報之多寡重輕而厚薄其施於是民
不幸而死於昧醫者什七八死于貪醫者什二三其有
遇夫精斯術又能心聖人濟民之心以施之者蓋亦幸
矣余中歲多疾始患背疽因故太醫院使蔣用文得何

彥澄藥之而愈後數有他疾皆彥澄藥之愈不特余也
家之長幼内外有疾亦皆彥澄藥之愈又不特余之家也凡余
之親友有疾走彥澄無弗愈者即彥澄曰不治雖屢更他醫卒
不治彥澄于醫不專名一科自傷寒諸證至于小兒帶下諸瘍
皆有造詣而其心一以惠濟為務名其治藥之室曰皆春有
求者皆趨赴之不以寒暑風雨蚤莫稍緩皆未嘗責報遇寒者
輒曰此世所共矜恤者我其可後儒者輒曰此世所重道德人
也我當敬事焉雖或其致報未嘗取一毫故卒之日家無餘

貲而公卿大夫爭致賻奠德之之厚者皆往哭弔而閭閻行道悲慟相屬蓋平素受其施者皆以遇之為幸及其卒也雖為彥澄戚其亦為已而戚之也彥澄諱淵以字行鎮江丹徒人先世見余所為其父墓志彥澄襟宇和易灑落慎行如處女永樂中以名醫徵隸太醫院院使以下咸重之尤見重於仁廟屢欲官之輒以事不果彥澄恬不為意其長官欲舉為藩府良醫者力辭獨寶重所得仁廟賜書數十紙如拱壁一日顧其家人言曰

者謂我今歲所直五行不利無幾得微疾數日卒於北
京宣德七年三月六日也享年六十有一娶呂子男三
僞儀倫孫男若干僞倫自鄉奔父喪歸葬於是學士夫
夫或為文或為哀輓之詩余於彥澄尤厚為著葬銘銘曰
世有何彥澄固知遇之之難世無何彥澄宜愴惘而
悲嘆遽乎其業之精懋乎其存之厚嗟若之人兮曷不
臻于遐壽

東里文集卷十九

欽定四庫全書

東里文集卷二十

明 楊士奇 撰

墓誌銘

孝子曾先生改葬誌銘

泰和有孝子曰曾元友先生沒而葬五十有八年矣其子愚將改葬寓書北京曰先人初葬不肖孤方髫鬢不能請銘於先輩君子甫冠而坐累謫西川數十年幸老罷歸又幸得吉壤將改葬先人如又不請銘不孝莫大

矣然先輩君子淪謝已盡今婣戚中知先人者惟子遂
視所述事狀曰必無辭嗚呼士奇外祖母曾孺人先生
女兄也士奇幼孤先生以外祖母憐愛之故時過撫問
又時遣人抱至其家親著膝上啖以糗餌教誦古人詩
成誦輒喜動顏色士奇恒著於心不敢忘銘其敢辭按
曾氏自團練使某由金陵徙泰和始居邑西之文溪以
儒傳家代有仕者至梅伯宋舉進士紹興府同知析居
岳家巷子懷可元袁州路儒學教授學者稱鷗江先生

子思立篤學不仕學者稱竹間先生子三男一女男龍
友益友季即元友先生女歸陳靜得先生先夫人父母
也元友先生諱鼎元友其字晚更字有實孝友之行出
於天性自幼服勞奉養恒先諸兄元季紅巾寇猝掠泰
和先生獨負老母出走寇追及欲刼之去跪陳母老無
共養者寇怒揮刀將殺其母先生以身翼蔽母寇益怒
連數刀斫先生頂肩及足血流于地而抱母不舍寇帥
踵後至憫之命從者以其母子入營給米肉且敷善藥

數日創愈予資遣人護送出時兵禍日甚奉母竄伏山谷甘旨恒充未幾江西行省叅政全普庵薩爾辟為濂溪書院學正遂迎母就養全死奉母歸先廬既廢於兵縣尉楊某為構室數楹居之榜曰曾孝子廬母沒哀毀而盡力喪葬江西內附吳去疾知州事辟典稅課州人譽其廉平洪武三年改州為縣侍御史劉昭先知縣事以明經舉引疾辭八年知縣郝思讓建社學於城內外教民俊秀朔望躬視督勸禮致明師十人以先生為首

館下生後多成名以升先生眉宇秀朗面潔白如玉儀
度偉然博學強記而專禮經工詩擅八分書範金為小
印章渾然古意占筮精康節數嘗奇中蓋春秋五十有
八生元延祐辛酉八月廿二日沒於洪武戊午五月廿
九日元配鄧氏繼胡氏子男二愚頑皆胡出頑蚤卒孫
男三沆濬深深蚤卒曾孫男四鎡鑑錫銳元孫一敷改
葬以某年某月某日墓在某鄉某山之原銘曰

凡人百行孝其權輿為孝有誠天將弗違矧曰人乎猗

歟曾孝子厥有錫類錫類無替曾百世祀

故翰林脩撰馬君墓志銘

永樂十年進士第一人長樂馬鐸授翰林脩撰明年車駕幸北京十五年再幸皆留侍監國其於公事所當為者雖勞且艱不避雖數獨任不辭皇太子屢顧翰林學士楊士奇曰馬鐸可謂質實無偽者矣自是翰林學士國子祭酒司業有公務出皆命攝其事蓋署翰林者再署國子者一衆咸謂皇太子明於用人而鐸無忝厥命

者也鐸字彥聲其先家饒州樂平宋宰相廷鸞之弟廷
龍始居長樂廷龍之後有兄弟三人曰隆曰傑曰鈞皆
舉進士至源夫伯載谷進其曾祖祖父也母卓氏彥聲
自幼已嶷然異常兒稍長即有志問學初授禮於鄉先
生鄭孟宣遂旁通易詩書於子史百家多所博涉為文
援筆輒就自太學生中應天府永樂九年鄉試明年中
會試廷對賜及第為脩撰授承務郎一考陞儒林郎三
考皆最仍命復職先是上自北京遣使以御製書賜南

京國子學學師生將詣謝會長官以他事去職踰月彥聲來署學事即具裝偕行衆謂彥聲後至可不行彥聲不可則相率助道里費彥聲曰鐸乃用是煩勞諸君耶一謝卻之處事公恕監官有挾前輩數與為異同者彥聲面折之以大義卒帖服春秋釋奠先師制用翰林國子官四員分獻翰林獻位故在左後有易之及彥聲行事卒辨而復之於內有孝友之行一弟篤愛之弟死哀慟既葬其鄉縣山之原顧其子昕曰他日葬我必於此

吾兄弟生死不違也為人耿介伉直無崖岸表裏一致
臨義執言侃侃無所顧避不為外飾自奉儉薄雖貴不
變與人交必誠必盡遇危急必濟之在京師直所居道
側洿池中嘗冬夜有凍溺者聞而遽出之幾斃矣易其
衣予飲食及藥久乃蘓所為類此皆未嘗自言閒暇讀
書鼓琴以自適所居據山林之勝嘗名其書室曰梅巖
後遂以為號永樂二十一年六月初六日以疾卒於官
享年五十有八娶鄭氏子男二昕旺女二長嫁林浩次

嫁陳稠孫男三繩繹純其卒之明年所始克聞訃自長樂走北京奉喪歸葬縣山合于弟之窆遂奉翰林脩撰李騏所具事狀并介李君求余銘嗚呼彥聲余考會試所取士也又同處翰林十年相好厚而相知深宜其以求於余也銘曰

馬氏之鄉有湖洋洋湖有浮石馬氏之祥昔也其兆兄弟聯登今也其兆彥聲之徵嗟嗟彥聲允直而剛曷其奮興弗施之閔嗟嗟彥聲奄歸以藏其垂弗泯史氏有

銘

思貽先生楊君墓志銘

先生諱肇字仲基一字伯開思貽者所居堂名鄉里因以號先生焉楊氏之先出關西唐末由長安徙杭宋又徙吉又自吉水之楊莊徙西昌自徙西昌至先生十有五世曾祖諱景行元延祐乙卯進士官至翰林待制洪熙中贈少傅兼華蓋殿大學士元史有傳妣弘農郡君嚴繼高皆贈夫人祖諱介清江縣主簿妣項考諱章妣

蕭先生其仲子也其幼時主簿公特異視之曰此兒壽
福過吾輩遠矣稍長為從父彥中後而孤貧能頌頌卓
立負直氣非其道不肯苟屈下弱冠從學季父益民於
贛時詔守令舉賢才贛守鄒奕併舉先生叔姪送詣江
西行省先生以學未至辭叅政端公曰仕優可學也固
辭乃聽既歸屬兵亂初定親戚之僅存者皆散徙遠邑
先廬悉毀園田為豪奴姦僕所侵斂無遺先生孑孑勤
力僅復什一二而累世墳墓久未有展省榛蕪莽蒼中

或迷不可辨識先生徧咨遺老除荒蕪營悉求得焉而
率子弟及時謁拜惟謹買田墓下以供祀事即故址作
室復先人之舊日以教子讀書為切務曰此吾祖宗所
用植身遺後者豈當至我遂廢也蓋先生所存心靡事
不以承先為重監察御史過西昌舉先生訓導又固辭
永樂中其弟及子皆官翰林先生喜嘗三至京師皆留
數月父子兄弟極懽而後歸歸必留規益曰勉自効以
稱國恩且光我先人我老死丘園瞑目焉先生幼罹兵

亂備極艱苦既冠而亂定拮据勞瘁用造室家自是脫
危履安遂其生意而至於老死未嘗一日忘國家太平
之澤性剛果遇事是是非非不肯脂韋媵媿以避怨尤
以是鄉後進率嚴憚之邑大夫歲舉鄉飲必賓禮先生
先生生元至正己丑正月十六日卒於宣德癸丑三月
十三日春秋八十有五娶康子男五長相永樂甲申進
士翰林庶吉士刑部浙江清吏司主事先卒次旅為從
弟仲殷後次弼為族弟仲岡後新授吳江縣學訓導次

鵠為兄伯威後次艮女一嫁蕭誦孫男十四奕與某某
女若干曾孫男若干士奇先生再從弟也自幼至老相
篤恭愛蓋六十七年如一日世之同產者或莫逮也先
生老且病無他念獨念不得復一見士奇與人言輒流
涕士奇蓋同此心也顧受國厚恩未敢急其私今竟負
吾兄矣嗚呼慟哉聞訃之後五日忍慟述其平生大槩
為銘將使其子饒石而納諸墓銘曰

楊氏之宗故望于邦世否而墮一綫之微艱而振之自

我思貽嗚呼思貽崇孝之道躬踐以達介壽於耄古壤
在原有子有孫述行有文世續勿諼

梁紀善墓志銘

宣德甲寅七月丙子朔魯府紀善梁本之卒於官本之
初病王日遣醫賜藥既卒賜棺及賻為文遣官祭之於
是其子梟將奉襯歸葬泰和某鄉某原具狀求余為銘
梁楊世婚嫺家本之之考哇樂先生妣陳安人及兄用
之皆余銘其葬矣今於本之又義不可固辭梁氏先世

已見其父兄銘文本之諱混以字行晚號坦菴自幼嗜學始從其父兄稍長出就鄉先生質疑請益弱冠即窮日夜研鑽傳註力求諸古人不暢不止遂貫通四書及詩書二經鄉之號前輩者或不及也瑞州府學聘訓導瑞學久闕師士習庠陋本之力作新之飭其學者曰人皆可為堯舜夫學則聖賢可至不學則陷沒為庸下人若之何甘自棄也旦暮躬率勵之為之講說敷析罔達學者始有悟入日進其功不能自己旁邑之學者來從

加多自是大比瑞之士彬彬出矣九年陞溧陽縣學教諭溧陽學亦久弛本之篤於教不減在瑞數年其學者勃興如瑞未滿九年父喪服闋改納溪縣學納溪士習尤陋亦盡力作新學者稍知嚮方旁邑學者亦有來從蜀獻王聞其賢奏舉為紀善獻王崇儒重士作寶賢堂日引官屬之賢而有文者討論古義或命題試文章以適而盡出府中書籍資之由是其官屬學識皆進而本之尤傑出本之臨事論議侃侃盡公道甚見獎重雖小

人有不便不為動蜀僖王嗣立重其盡誠輔導嘗致白金文綺為其母安人壽母喪服闋改魯府紀善僖王復因使存問賜白金等物在魯府五年卒春秋六十有五本之事父母孝父母安之敬事其兄撫其兄子厚惇睦族嫻伯舅之子賞少孤貧陳安人甚憐之命二子教之本之赴瑞州遂以賞及其從孤弟洞偕行旦莫督勵其學後賞洞皆舉進士去賞卒其孤甚貧以子妻之凡此皆孝之推也為人剛方公直是是非非不肯苟徇平居

未嘗一枉已干謁有司凡賑鰥寡恤死喪無厭倦意為文章典則古雅雖老不廢學問教學者必盡心後多成名所至舉墜興廢在溧陽出已資倡義一新廟學增其舊規嘗考湖廣鄉試鑒別公明士論愜服襟宇坦亮闊畧學宮講授之暇與達人韻士觴詠酣暢翛然物外之趣有詩文若干卷藏于家配劉氏孝行如夫先三年卒子男二長梟泰和縣學訓導孝行如父母次樞女四長嫁王棟次楊持次陳昇季楊稷嫁王氏者蚤寡居孫男

四恩憲懋忠女二銘曰

於乎本之允篤孝德於乎本之允淑訓迪洊屬宗藩亦
允弼直銘以揚之來者其式

張從善合葬墓志銘

洪武二十八年八月十八日東阿張公從善卒張之先
出琅琊今居東阿五世矣祖欽父誠母李氏公諱仁幼
喪母鞠于嫂氏自少負氣節年十九遭元季之亂為義
兵千戶數與渠寇號關先生破頭潘者力戰有名無幾

元亡遂解甲還鄉里力耕養親以自適其儀狀偉然而剛正自持論議明決鄉黨有爭訟求直者多不之有司而之公有少年酗酒虐人莫敢誰何者或紿云公且至少年即縮首斂避家居教子為務子學成將仕勵之曰仕必務持身事君愛民舍是雖有他善無取焉與人交輕利而重義春秋六十有四而卒其配丘夫人世家宿州元義兵萬戶某之女年二十有三歸張氏從其夫兵間備歷艱險而事姑孝自始至終喪不少衰後改葬姑

啟壙而土室其元七竅懼布拭致傷悉舐而淨尤嚴母
道仲子本初為江都知縣迎夫人就養時祿入不繼朝
夕極淡薄終不以一毫苟取於下而處之裕如上官聞
知縣有賢母咸助甘旨至有以母敬事之者上舉兵靖
內難既渡淮遣使諭諸郡至揚州城下夫人諭本曰此
天命也違天不祥汝宜為城中百萬人求生道本遂躬
率江都父老詣軍門迎見江都人皆免於兵難戴知縣
德而亦皆知其出於夫人之教也上既正大統擢本揚

州知府陞江西右叅政遣迎夫人城中老稚及婦女送者數千人又有不忍其去而流涕者凡本在官暮歸必問所治事當則喜如不當可改即命改之或已不可改即色憂不言其重者輒不食以示儆本間於政有疑必咨稟而後行後以刑部侍郎奉命督務山東遇疾便道過家夫人見本畢語之曰其出止公館國家非重務不命大臣雖病可以卧治即萬一不起不失為以王事沒今事未就緒其可便安私舍哉其達於大體類此年已

大己日軍人書

母夫人誼不敢辭故叙而銘之銘曰

偉矣張公閎毅而通弗顯于庸不係其逢有賢厥配允
篤于孝亦明以肅篤子之教繇郡歷藩秉憲在廷直方
潔清無忝所生鬱鬱崇丘廼奉合藏雙璧下潛永揚輝
光

故工部營繕司主事劉君墓志銘

永樂二十二年工部營繕清吏司主事劉季荒卒於官
其孤紳寅奉事狀介吏部郎中陳叔剛請為幽堂之銘

將歸葬焉君為刑部侍郎時嘗監脩永樂大典于文淵閣與余常相聚有知契故不得辭按狀劉氏其先汴人宋建炎初某官某扈從南渡遂官餘姚其子孫業儒亦代有仕者至諱某為丹陽書院山長嘗考浙江鄉試其祖也諱某為慈谿縣儒學教諭門人私謚中肅先生其父也母張氏君諱韶字季麓以字行自幼端靜喜學問為父母所愛既承其家訓長而進學鄉先生宋玄僖王孟暘之門刻苦自勵二先生咸器重之登洪武甲戌進

士第授行人司行人時重行人之選非進士不授凡方岳大臣率出此君為之一以所學不肯苟嘗持節使雲南四川朝鮮所至宣上德達民隱餽一毫無所受事聞賜鈔襲衣丁丑陞陝西布政司左叅政先是陝有逋賦民積歲不能輸有司峻刑督之君至慨然曰民困故不能輸為之父母又忍峻刑督之耶與其察謀分行郡縣解其繫緩其期勞來綏輯而從容勸誘焉民皆感激思奮曰是赤子矜念我可不戮力以累仁人奔走假

貸以輸無幾畢完陝不產硃砂而歲有課額民窘不能
償至或償其家者君為奏罷之洪渠水溢為民患躬行
視之為設法治堰民賴以安蓋凡可以利民者率盡心
焉華有郭子儀祠已壞過之歎曰此崇德教民之務何
可忽督令丞脩葺之凡所過祠宇有關風化而壞者必
風郡縣葺理之其達政體槩類此在陝四年可書之績
尚多被召為刑部左侍郎尤懇懇重民命平反具獄數
事陝平民王某為強盜所引逮至而所引者已伏法不

能自白君察其寃召所引者之妻子使識之而聽其詞
竟得實王免於誣有典守錢穀而虧兌者既被逮則援
引千餘人同罪君廉知其誣卒辯所誣引者釋之河陽
逆旅夜有朱趙二人異室而宿朱怨家後追至殺之而
誤中趙朱實不知天未明行十數里逆旅主人疑朱殺
之追執送官鞠訊考掠朱不勝遂誣服不敢求辯君獨
曰是偶邂逅相聚非素有負且計其裝非有圖也特緩
其獄遣人密察之無幾有司竟得殺趙者而朱以緩獄

不死揚州民胡氏夜有賊入其室殺人而遺刀屍傍旦
視之柄有隣家蘇氏私識官捕鞫蘇蘇曰家失此刀久
矣不服既備極諸刑竟誣服君潛使人懷刀往察其隣
一童子識之曰我家物也遂得賊而釋蘇蓋其理刑一
以求生為務永樂乙酉朝廷廣召文儒纂脩大典命太
子少師姚廣孝禮部尚書鄭賜監脩而擇六卿之貳有
文學者一人為之副遂以命君討論裁處人多服之書
成受厚賜庚寅坐失出罪人左遷兩淮鹽運副使未行

復留丁酉改工部營繕主事躬勤治職未嘗以崇庠為
意壬寅得痺疾明年正月某日卒享年六十有一君為
人清素雖歷顯要而泊然自持居家敦孝友之行接人
有謙讓之節雍容雅度有犯不校閒暇手不釋卷治經
長於春秋喜吟詠冲澹優柔有陶靖節韋刺史之趣所
著文集若干卷藏于家娶潘氏子男四紳寅辰復辰中
永樂庚子順天府鄉試先君一年卒女二長適安遠縣
學訓導趙佐次尚幼君之葬以洪熙元年正月八日其

墓在其邑某鄉先隴玉燭之原銘曰

學有以用於世才有以達其志得失無所忤乎內勒銘
其藏垂休永代

太子少保禮部尚書兼武英殿大學士贈榮祿
大夫少保謚文靖金公墓志銘

太子少保禮部尚書兼武英殿大學士金公以宣德六
年十二月十六日卒訃聞上嗟悼甚至贈榮祿大夫少
保謚文靖命禮部尚書胡濙賜祭又命自喪至祥禫皆

遣官祭勅有司治喪葬百需所以褒寵之厚且備矣公諱善字幼孜以字行其先世見余所作其考雪崖先生神道之碑公自幼嗜學問內承家訓之篤長從前進士聶鉉先生受春秋經得其微旨中進士乙科授戶科給事中太宗皇帝初臨御注意文學士改翰林檢討居無幾簡翰林之臣七人處之內閣付以密務而兩制悉歸焉七人者廬陵解大紳胡光大永嘉黃宗豫南昌胡若思建安楊勉仁公與士奇也數月皆陞官公為侍講授

承德郎仁宗皇帝在東宮時翰林春坊司經局之臣日
講經史公專說春秋敷析簡明睿旨稱善遂命纂十二
公事作春秋要旨三卷以進永樂五年陞右春坊右諭
德仍兼侍講授奉訓大夫七年車駕巡狩北京公與光
大勉仁同扈從八年扈從北征冬還南京陞奉直大夫
十年賜誥命贈其考守正為右春坊右諭德母陳為宜
人封母羅為太宜人贈妻孔為宜人十一年扈從巡北
京從征北邊十二年復從北征陞翰林學士仍兼諭德

脩五經四書性理大全為總裁官授奉議大夫十四年
還南京明年扈從巡北京預脩太祖皇帝實錄十八年
陞文淵閣大學士仍兼翰林學士二十年扈從北征二
十二年復從征北既旋師中道宮車晏駕初喪至歛皆
勉仁與公據禮行之既而勉仁先馳歸報道中之儀皆
咨公而行仁廟嗣位進戶部右侍郎仍兼文淵閣大學
士翰林學士踰月陞太子少保兼武英殿大學士專典
內制賜大臣五人銀圖書其文曰繩愆糾繆蓋以匡直

勉之公其一也奉命持節冊封趙王妃及封梁王洪熙
改元命兼禮部尚書三俸並支大臣兼三俸者惟勉仁
與公兩人賜誥命授資善大夫贈其祖仲卿及父皆太
子少保武英殿大學士祖母周母陳皆夫人進封母羅
太夫人贈故妻劉封繼室屠皆夫人以法司論死罪多
冤抑命自今臨決必會大學士三人同審而公預焉詔
百官有親違離三年以上者聽給告歸省公首奏歸省
母蓋前此百司職務填委無敢言私至是公首奉詔賜

賚甚厚是歲丁太夫人憂上嗣位詔脩兩朝實錄起公
為總裁官明年奉命持節之寧夏冊封安化真寧二王
妃歷河南關東西之境弔覽周秦漢唐以來遺墟故址
悉見賦詠所過兵民休戚既還具言於上實錄成賜金
織襲衣文綺白金鞍馬是歲扈從巡邊至宣府而還歲
餘得疾上遣太醫院官視療數月竟不起春秋六十有
四公為人簡易沈默溫裕有容居家敦孝友之行既仕
事上以誠持論必正扈從北征時道中士卒有憊者太

宗皇帝知之以問羣臣羣臣未有對公直對宜遂班師
凡於公務致勤不倦處同寮能讓於人汎愛無忤其學
該博文章和平寬厚類其德性四方求者無虛日靡不
酬應得其一篇一詠者皆寶重之書兼工真行嘗考會
試者一讀廷試卷者四不伐善不驚名初陞學士寵賚
日加即以盛滿為戒名其燕處之居曰退菴疾革士奇
與勉仁問之有何言公言受國重恩上無所益朝廷下
無所益生民何言傍或啟之請身後之澤者公正色曰

君子所耻訖終清明未嘗片語涉亂既卒自公侯六卿暨諸司之長皆哭弔奠祭士無賢愚皆有喪善人之嘆嗚呼儒者際遇始終光榮如公一世其幾何人公之所存蓋無忝矣子男五長昭伯宣德二年進士次武伯堅伯文伯壽伯女五皆有歸孫男六女三公葬以卒之明年某月日墓在某縣某鄉某原銘曰

玉筍崔巍金川湛澄公生其間萃蘇挺英賓興賢能濟濟偕至青萍出匣淬礪初試六御乘時登庸玉署清邃

崇嚴叅典密務恪勤夙夕小心寅恭于狩于征龍旂率
從上承簡知履坦平平鵬游滄溟鵬翺九天歷事三聖
敬終猶始不競不綵有譽無毀方簡大冊天府所藏崇
碑厚碣敷在四方謙退之存易簣不貳嗚呼文靖可式
有位

故汝寧府通判詹君墓志銘

洪武九年汝寧府通判姑孰詹君以疾聞得賜歸道經
新蔡卒遂葬新蔡龍潭之側至永樂十年子恩為開封


府學訓導以公事過新蔡將啟其墓歸葬求墓不可得
詢諸傍近蓋河決其地已久徒見波濤渺漫也蓋距葬
時三十有七年恩慟先人體魄之罹於不幸也將取古
人葬衣冠之義為墓庶以係其後人之思又以為葬必
有銘庶不泯其先德焉於是以湖廣布政司叅政李衡
所述行狀介翰林孔目杜謙來請按狀君諱俊字用章
詹世家姑孰祖諱正考諱貞皆隱於耕讀居青山之下
君少好學受易於前翰林學士陶安洪武四年被徵授

河南磁州同知賜冠服銀帶到官書公勤廉謹撫教安
懷八字揭座隅以自勵時兵革初定民復舊業君勞來
安輯之勸督耕桑興學選師明飭教令舉賢薦能扶剔
弊蠹蓋力居多焉民有訴發地得金為衆所奪者君立
衆于庭諭以義利衆悉還所奪民德君懷金謝之拒之
曰我以義利導民乃躬為之耶民愧而去嘗董民餽饟
潼關天寒道中車牛多斃饟虧即解所服銀帶易粟代
民輸民歸製帶償君君曰吾得紓民憂何愛一帶且未

嘗名貸也何為償不受為政一於公平林縣官闕府檄君權理無幾有令民以賦出戰衣磁州耆老羣訴于府乞還君以均賦歲蝗自為文禱神蝗及境不下而過嘗旱作憫旱詩自責已而大雨霑足三年陞汝寧府通判凡所以盡心民事亦如磁州而守身益嚴嘗治廨舍役夫得窖錢以內君君曰此汝所得者何與吾事悉畀之郡闕守貳君獨治之民無失業吏無滯牘及去磁汝之民老壯皆有不忍別之意蓋年四十有四而卒君喜吟

詠平生所作多散逸有公餘小稿一卷藏於家尤喜作
大書娶宋氏子男一思女一嫁韓奕孫男三萬里中永
樂十八年鄉試千里百里曾孫男一銘曰

嗚呼詹君生能仁其民沒不能庇其身孰之為之匪繇
乎人青山在原歸然表墳春秋霜露來拜如雲靈旋歸
哉以福後昆



東里文集卷二十

欽定四庫全書

集部

東里文集卷二十一

詳校官檢討

臣羅國俊

中書

臣劉源溥覆勘

總校官進士

臣楊懋珩

校對官主事

臣張培

謄錄監生

臣張永漸

欽定四庫全書

東里文集卷二十一

明

楊士奇

撰

墓誌銘

孫子良妻杜氏墓誌銘

兵部郎中海寧孫子良喪其妻杜氏將歸葬其邑安吉鄉橫塘原求余為銘曰吾妻之沒也吾深悲之不能忘吾妻之歸吾家也事吾親甚謹甘旨滄藹之奉不待咨吾而未嘗乏也吾妻生長宦族父母甚愛之盥漱烹飪

之事未嘗任也既來事吾親曰此婦職也躬任之如素
習焉吾親有疾晝夜侍憂形於色吾親安乃已吾弟妹
皆吾親所愛也吾妻亦愛之如已弟妹焉簪珥衣物恣
所取吾親沒弟妹未嫁娶也吾妻皆為之嫁娶畢力盡
禮如吾親之存也其孝如此吾自為太學生登第為翰
林庶吉士至為兵部郎中未嘗一日不在公而敢退謀
其家也而吾家之朝暮寒暑之需賓客之奉吾亦未嘗
置意而無所不足者有吾妻之理於內也而今亡矣所

生五丈夫子長者十餘歲幼者未甌又幼者始晬今吾
朝出而晚歸則長者携其幼者森森左右牽吾衣而號
啼呱呱吾妻沒傷於吾之情又如此此吾所以深悲而
不能忘也吾妻海寧縣丞某之孫行簡之子生廿有一
年而歸我又十有三年而卒其卒在永樂十一年十月
二日五子收昫昉旺禧嗚呼幸乞我銘銘曰

家人之義女治乎其內內則之紀孝莫大焉夫杜宜人
者非其有聞乎不然其何以臻乎是也來者尚承於世

世

樂母胡氏墓誌銘

永樂十七年五月初三日西昌之和溪樂母胡氏卒其
塾賓翰林庶吉士廖謨為述行狀又為書致其孤金之
意求葬銘按胡邑世家其先與忠簡公同族大父古礪
父清翁先待制所為序礪月集者母天資柔婉端靜幼
知讀書自重年二十歸樂大成樂里中儒家嘗有科第
於宋大威力學圖紹先業未成名而死方病革時母禱

北辰乞代死以首叩地血流滂然被面大成且死顧母
曰汝尚少其終不異志否乎曰君何為出此言婦人從
夫有一而已我獨不知古人乎且不復再見君地下耶
即斷髮示信夫卒數歲兄弟將奪其志輒慨然嘆曰節
吾可失乎吾既誓之吾夫矣兄弟猶數強之即嚙指洒
血以示乃無敢復言者孀居五十餘年以禮自持於治
家教子皆盡力曰不可以羞樂氏瓊州太守王公伯貞
大書其堂曰節婦鄉先生謝子方為之傳其族姻閭里

相與謀上其行有司以求旌褒母聞之曰凡吾所為盡
所當然豈以為名乎力止之乃已樂族當元季多死於
亂兵未葬出貲教其子皆葬之歲屢發廩賑貧乏春秋
八十有七而卒惟語諸孫宜及時務學立身不及他事
子男四金玉琳彥女一嫁胡子文孫男五女四曾孫男
七女八葬以卒之歲某月日墓在某原銘曰

松栢之貞表於雪霜偉此淑人坤德之方皎皎素壁曾
何璽瑕君子之思君子之華

故妻夫人嚴氏墓誌銘

夫人嚴氏諱琇年廿有三歸余時甚貧踰月徵詣京師除王府審理明年再遷翰林侍講乃迎夫人來居十年謂余曰先舅姑墳墓容當久曠展省耶且君素不事生業他日蒙恩歸老不豫所以自資者乎君方致力報國義不得顧私妾請行焉遂以其子歸買園廬於城東清谿之上躬勤家業而樹畜為務又六年余得疾頓劇累月未解夫人以其子來視又四年余侍從赴北京夫

人挈其男女歸鄉里歸四年得疾歲餘卒洪熙改元三月十三日也距其生洪武戊午之歲四十有八年嗚呼惜哉夫人蚤喪父未嘗學問而天資溫靜明淑所為往往近道自用以儉處族姻以忍為和敬長慈幼咸當其分男女非已出者恩愛均一人莫知其非已出也而助益余尤多余或有過舉必曰君常教人以無為是也或公退不憚曰事求無愧耳成敗禍福聽之命何用不泰然哉間與客論辯夫人自內聞之客退謂余君面折人

侃侃不少讓此為盛德耶且人之樂聞過者寡矣不見
某某其於今何如也隨事相規類此嗚呼豈謂遽喪吾
賢妻哉夫人永樂中封宜人數朝中宮初賜內製五品
冠服後累賜文綺楮幣今上臨御惇念舊臣士奇屢進
官至從一品遂得推恩以其官品贈三代而封妻為夫
人命下三月夫人卒嚴氏泰和名族有科第仕宦數百
年宋理宗朝諱肅稱朴山先生宰相馬廷鸞江萬里上
其所著易解天子召以為秘閣校勘不受揭文安公所

為著碑者夫人六世祖也元字用父稱後山先生為高
安縣尹吳文正公所為銘墓者五世祖也高祖恭則曾
祖元實祖仲庸皆富而敦禮父文明謹靜耿介夫人之
所自者遠矣子男四稷種植秫种先卒女四長嫁梁楫
其三尚幼夫人卒時余在北京聞訃遂買石刻銘寓歸
俾稷以葬銘曰

卜之吉築之密維伉儷居以匹尚其有待偕此玄室

太傅黔國公夫人程氏墓誌銘

宣德六年十二月二十日征南將軍太傅黔國沐公之
夫人程氏卒享年五十有八程世家廬州之舒城洪武
初積武功至萬戶守金華諱俊卿者夫人伯祖也萬戶
從子諱庸字得中娶甘氏夫人父母也夫人生於洪武
甲寅十一月二十四日生二十有一年歸黔國為黔寧
昭靖王之介婦黔國時僉後軍都督府事遂授誥封夫
人夫人貞靜柔婉處室有孝行既歸逮事姑兼隆敬愛
先祠祭薦必以誠處娣姒怡怡如兄弟於長幼戚疏恩

意咸當謹禮度貴而能謙富而能儉有寬惠逮下之德
治家秩然條理黔國奉命鎮雲南三十餘年夫人留侍
太夫人居南京黔國所以能盡心焉展其才猷宣上德
威不煩鞭笞而諸夷皆革心嚮化使西南萬里之外帖
然如即衽席之安者亦以夫人善其家政無內顧之慮
而得專其心於臣職也夫人其賢矣哉昔周之盛際諸
侯夫人及大夫之妻皆有賢行如召南鵲巢采芣諸詩
所詠者蓋一本於文王后妃之化我國家自祖宗開創

茂隆化本而昭靖以至戚豐功最貴且近則其家涵濡薰陶於上者尤深厚矣夫人之賢其有所本哉夫人之卒也朝廷遣官賜祭喪葬一給於公固出國家厚勲親之典亦惟夫人之賢有以光承之矣夫人子男一儼女二長為趙王妃先卒次許歸武定侯郭玪孫男一玘女一夫人之葬以卒之明年某月某日墓在某縣某鄉某山之原銘曰

禮著內則詩詠宜家維家之本而德之華國有君子桓

桓柱石厥有主壺內周于德隆尊惠卑咸和戚䟽外內以辯儀節不踰五十八年哀榮兼備述行有詞垂範來裔

張處士妻陳氏墓誌銘

宣德三年十月十七日建安處士張伯銘之配陳氏卒時其子珂仕京師將奔訃歸遂以父命纓經詣余拜請墓銘余素與珂往還諾之又拜且言外家世居建安璜溪里外祖諱某先母年若干歸家君家君嘗訓珂兄弟

言吾少時吾親為謹擇配得汝母汝母之初歸吾也吾家尚薄汝母佐吾朝暮養吾親甚孝至于喪葬至于終身薦祭其孝不衰於睦宗姻慈幼逮賤率厚有以當吾之意凡吾家衣服飲食賓客所需於為之有道及增益吾家於今之裕皆汝母之能有以輔吾也小子其毋忘珂兄弟謹識之今珂所慟鉅者珂之幼也母勵之學壯而仕也勵之忠君而愛人嘗一就祿養於官又勵珂曰子之敬愛其親在承志耳口體之適末矣珂繼今不復

有聞於母之訓也余曰賢哉其宜有銘按陳氏諱妙善
生元至正丁酉六月初十日享年七十有二子男三長
即珂永樂四年進士授行人陞贛州知府今為宗人府
經歷次善先卒次璉女二長嫁魏德次嫁魏珣孫男六
長吉次壽次慶次安次寧次祥女五長嫁楊讓次嫁陳
某曾孫男一文達墓在某山之原葬以卒之明年某月
日銘曰

婦也有誠妻也有恒母也克明德善之祥來嗣以興

兵部職方員外郎周君妻宜人王氏墓志銘

兵部職方員外郎吉水周君之配王氏初以其子叙貴
封孺人後以職方貴封宜人宜人之初得疾於鄉也叙
在北京奏乞歸省詔馳驛以行既差數年宜人復疾叙
復奏歸省侍疾越兩月宜人竟不起宣德七年六月十
四日云於是叙以職方命來求墓銘余與職方同郡同
朝叙又從在館閣久不得辭乃按狀叙而銘之王世儒
家與周同邑元沔陽學官德明生君賢君賢生子職洪

武壬子鄉貢進士歷睢寧浮梁濟陽三學教諭宜人之
曾祖祖父也母彭氏宜人諱靜王氏家範素嚴子孫不
得小有過失而彭氏博涉書史明於化導故宜人德性
蚤成既笄擇所歸周故名家岐鳳以文學為君賢所愛
遂歸為繼室職方君也初歸丁家中衰力勤於內以助
興復事舅致誠敬不及事姑歲時薦祭如事生撫前室
子慈愛踰已出職方兄弟三人其季以口衆求析爨職
方顧宜人言何若對曰祖父來不析而今析乎既析欲

復合得乎職方言是吾志也乃不析長育孤姪同已子而皆成其室家教子若孫必務學旦暮程督於內且恒戒之儉約闔門食指七百餘衣食均一人無間言既嫁未嘗一日忘父母始職方為即墨簿宜人偕行教諭時在濟陽先朝靖難之師及濟陽宜人逆知父志泣曰吾父必不生矣請於職方遣人往訪凡三往竟得其遺骨及遺文以歸恒自歎吾乃為女子不得以時展先人丘壟念及輒酸楚至老猶然一日約女兄弟俱省父母墓

至則大慟幾絕蓋自是益病踰年遂卒將卒召其子若婦戒之孝悌儉勤而出所遺衣物分給族姻孤子之不能婚嫁者享年六十有八子男三勉叙廣叙永樂戊戌進士自翰林編脩陞脩撰二女其壻進士金昭伯廬州府學訓導彭埴孫男七蒙渙復巽同伯咸恒女三曾孫女一葬以卒之歲九月十五日墓在醴塘泥洲之原銘曰

士之百行惟孝為宗自古有女孝宜人攸同孝有錫類

其在周之嗣

墓碣銘

翰林脩譔蕭時中妻安人劉氏墓碣銘

永樂十四年五月七日翰林脩譔廬陵蕭時中之妻安人劉氏卒於南京年三十有三既歸葬其鄉時中自狀其行以其子緝來拜乞銘余嘗聞安人孝行於其姑矣則於表之以勵俗不當以辭永樂十二年時中迎其母太安人就養來南京而安人侍行既至踰月時中被召

赴北京又明年安人得疾太安人百方求醫竟弗治太
安人晝夜哭慟余於時中同鄉且同寮偕周編脩孟簡
往弔焉太安人春秋已七十泣謂客曰新婦初歸吾家
即事舅姑如事父母處長幼貴賤咸宜其為人和柔恭
慎未嘗有違禮自有此婦凡吾家縫紉浣漱饋食之事
皆其所為不以及吾而皆精潔如吾意自有此婦吾無
日不適今老矣方倚孝婦終餘年奈何其遽死乎而泣
下不已言愈酸楚不忍聞又數月太安人將以其喪歸

是時時中已南還旦夕且至矣余又與孟簡往問之盍
稍緩母子一見而後行乎太安人泣下潛潛曰人情誰
不念少子顧老矣無孝婦終養今幸歸有冢子冢婦能
養吾意決矣遂行余嘗自歎婦而致其姑愛之如愛子
喪之如喪子非誠孝能然哉安人諱冬字嚴貞劉氏初
自安成徙廬陵家於敖城板塘里世儒家其父楚玉母
顏氏其子男一人即緝也銘曰

此劉孝婦之墓無踐其塋無翦其樹孝有錫類其來無

替

太宜人于氏墓碣銘

尚寶司卿張信為尚寶二十年余時為翰林凡朝廷作
璽書則翰林尚寶供事上左右以是恒相比而余與信
侍仁廟監國十餘年相比又密時信母太宜人已七十
餘就養京師康健無恙喜其子之於余比也嘗語信吾
死得楊君銘葬足矣信奉以告余曰春秋不豫凶事奈
何為孝子出此言曰非信敢然惟大人之志也姑諾之

而日益熟其母之德善宣德元年太宜人年八十有六
正月二十九日卒既葬京城之南鳳栖鄉遂來北京請
銘按事狀太宜人姓于氏世家登州萊陽縣逢山鄉其
父宗族以行稱二公太宜人諱妙惠性行淑慎既笄歸
萊州掖縣進士鄉張氏其夫兄弟行以五稱太宜人之
為張氏婦也於尊卑䟽戚之屬能各盡其所當然於佐
夫之内外事能咸有條理歸二十年夫没居孀能謹教
育其遺孤男女能嚴保其家不隳一如夫之存也洪熙

元年用子貴賜誥命封太宜人男三長義以軍功積官至旗手衛千戶先三年卒次仁次信太宜人嘗疾劇醫弗能療信禱于神剖肝煮液以進太宜人飲之疾愈鄉里上其事於朝詔旌其門曰孝行而擢信尚寶司丞再陞尚寶司卿女二長嫁江陰衛百戶俞敬次嫁楊興孫男三晟昱昂昂襲旗手衛千戶曾孫男一洪上古聖人之教孝也有道焉中世教道微而孝之本諸天性者不泯故有出乎至誠或不能無踰於道為上者亦嘉寵其

誠焉耳如信是已然能為信之誠鮮矣其亦以有父母之教歟銘曰

崇丈之墳孝子之母生榮於躬沒裕厥後發潛琢辭以視縣久

羅孺人墓碣銘

永樂十九年十一月初八日泰和陳孔碩先生之配羅孺人卒時其子孟旦以泰和縣儒學訓導考績及孫年以事皆在北京明年始克聞訃屬士奇為銘將歸而刻

諸墓士竒先母宜人先生女兒也與孺人相親愛如同
產士竒生五歲與孺人家子孟潔同學同出入孺人撫
愛訓教之如子始終一意也先生沒久矣先母沒又二
十餘年見孺人猶見母也今人亡矣哀其能已乎銘其
可已乎孺人姓羅氏諱恩柔邑處士楚材之子處士孝
友廉潔之行斷斷不可少下古人前輩儒師君子皆推
讓之娶彭氏無他男子唯一女孺人也溫惠端靜自幼
凡織紵纂組衣服饋食之事習為之皆精嗜讀書於小

學論孟諸書悉能倍誦講說及并以配陳先生而納贅
壻焉先生早喪母迎其父海桑先生就養甥館孺人相
夫事舅一如事父凡生而養沒而葬祭必誠必盡蓋族
姻閭里皆稱先生孝子孺人孝婦無間言焉先生沒孺
居守節三十年謹禮度如一日治家教子皆以禮閨門
之間不嚴而肅宗族有寡孤匱乏者皆賙之處事率由
於厚蓋春秋七十有六而卒鄉鄙論壽德之稱必推孺
人子男二孟潔舉進士為翰林庶吉士次即孟旦女二

長適監利縣典史蕭賁次適曾永齡孟潔及蕭氏女皆
先十年卒孫男六年考練純純紘女三曾孫男女各二
銘曰

繫孺人之行柔淑以貞孝有自傳禮有自承既壽考終
吉壤肇塋垂祉錫胤厥來繩繩勒銘俾徵楊氏之甥

陳孺人墓碣銘

孺人哇樂先生梁不移之配姓陳氏元贛州路推官致
仕學禮之曾孫潮州路儒學教授以道之孫處士有慶

之子母蕭氏孺人諱某在室有女德父母求佳壻於名族得畦樂而內贅焉無幾遭元季兵燹焚蕩州閭鄉黨莽為丘墟畦樂與孺人掇拾煨燼拮据為庇以養母及婚嫁其弟妹畦樂教授里中二子潛混幾冠皆力學能教孺人曰學必務經術毋徒挾兔園冊自足耳其治家長少內外秩然有度而躬儉勤率先二子皆仕潛累官至翰林侍讀兼春坊贊善混累官至蜀府紀善孺人享祿養三十年凡所以治其家者一不變畦樂先生卒孺

人雖老教其孫曾一如教子之勤孺人弟仲述為監察御史卒於官其妻亦卒家甚貧遺孤賞及女一人雖依其叔而孺人矜恤教育之如子賞依梁氏以學後舉進士為廣西按察僉事又卒於官家益貧孺人又盡力矜恤之而以孫妻賞之孤异其篤於親義類此親戚有過必為之隱而喜道其善於利必顧義之可否待臧獲如子嘗曰此皆去父母而事我奈何不恤其教人亦必以此宣德元年某月日卒享年八十有一子二潛混也潛

先卒孫男若干孺人之卒也葬某鄉某原又三年混來
北京以狀求銘墓余嘗銘畦樂及潛之墓矣然余生晚
不及見先世事孺人祖母楊夫人先少傅吟窓府君之
子孺人自幼為楊夫人所愛歲時嘗携歸外家故多知
吾先世內事而數為余言之歸然姻戚老成人也而余
以長女妻潛之子楫又為長子娶混女皆孺人之命則
孺人墓銘奈何以辭銘曰

躬祿與壽有蕃來嗣嗚呼德人吉壤千歲

武夫人墓碣銘

中軍都督府都督僉事王公介新建伯李公言於士奇
曰或蚤孤賴先妣夫人勞心苦志育之訓之以克成立
有今日仰荷朝廷錄或之微勤而進贈其三代曾祖祖
考皆為驃騎將軍都督僉事曾祖妣祖妣妣皆為夫人
王氏所被寵榮盛矣惟或之旦夕寢食弗寧者日有厚
祿而不獲以奉父母一日之懽其尤弗寧者凡先妣所
以訓或者歷歷如昨日事不敢忘不敢違也欲刻石于

墓以示後子孫而非文不傳用敢布其私懇於是問夫人素所為訓者曰或生十年而先考棄背先夫人朝夕勉之於學曰惟學克知為人之道惟學可以植身日遣從外傳而躬程督於內又教之脩忠信恭讓之行於鄉鄰閭里或甫成童官召補世父戍伍於時尚童心先夫人勵之曰男子生當挺特卓立毋猥自局促未幾從征漠北鼎爾布哈之地先夫人泣而送之曰父母惟爾一子但愛重爾身即愛重父母蚤莫勤力奉公毋怠毋縱

人能秉心忠孝神明自佑也還未幾又從北征雅爾哈山
教亦如之還遂調燕山左護衛先夫人喜曰兒得所歸
矣太宗北平之師初出或在行先夫人送之曰勉務恭
勤以衛主勿顧念老身也大功成朝廷行報功之典進
或官至府軍前衛指揮使或入拜先夫人又勵之曰汝
發身行伍其艱難備歷之矣宜恒體念以恤下又明年
賜誥命追封或二代而封先夫人為太淑人又明年先
夫人以病不起此或所為永慟不寧者也余聞而歎曰

賢哉乎令母宜孝子之為圖其傳也既備錄其語遂為之誌曰夫人姓武氏世家永平之遷安及笄嫁盧龍王氏為得成之妻年四十有三得成卒生一男或以武功歷事三聖自燕山左護衛百戶累陞至驃騎將軍都督府都督僉事屢奉命率師討叛方承眷任之隆孫男六瑁瑾珏瑛理瑄女三夫人卒於永樂五年十月十一日壽六十有九葬通州清安鄉之原銘曰

人之為才厥有本源本源伊何父乾母坤有善有仁有

訓有言源澄流湜本厚枝健時有虎臣桓桓駿奔以從
以衛積勞樹勲邇言究之有聲必先維父維母其慶之
源母行之惇母訓之諄報施孔彰自天䟽恩清潞之湑
我我起墳永揚弗泯述德有文

墓表

禮部尚書胡公夫人范氏墓表

宣德三年三月十九日禮部尚書武進胡公之夫人范
氏卒事聞朝廷遣官賜祭命有司治葬事既葬之又明

年其子長寧齋主客郎中孫原貞所為夫人墓志以父
命拜求表墓余與尚書同朝三十年而南京相隣居十
餘年兩家相好也時尚書奉使命恒在外長寧方髻鬢
夫人及子留京師旦暮門內肅然無語笑聲聞外間遇
長寧未嘗不拱手端立道側俟余過有問則對否則屏
氣正容凝然夫人之父范先生嘗一至南京閒暇輒喜
過余譚論前史而道其先世文獻及鄉先輩聞人歷歷
如昨日事未嘗一毫涉聲利蓋清厚長者也他日余家

人私論隣比婦德之賢而有禮者必首稱夫人余曰觀其父與子可知矧胡公之儀于家有素乎尚書屬余文非以余之素相知乎按范今為武進人系出宋石湖先生成大胡出文恭公宿二家門地相望夫人曾祖珙元嘉興路通判祖致康西興鎮巡檢父仲安隱居教授夫年若干歸胡氏為冢婦逮事姑姑治家嚴肅夫人孝敬為諸介婦先於妻道母道咸盡於友介婦睦族姻咸宜胡公舉進士自給事中累陞禮部左侍郎太子賓客

兼國子祭酒至尚書夫人亦再被恩命自淑人進夫人
雖貴盛其恭勤儉約一無所改易曰恒其德貞夫人有
焉卒年五十有一葬邑孝仁鄉周莊之原子男一即長
寧既葬母廬墓側久不去聞父召乃詣北京鄉里稱之
女一適林圪嗚呼先王盛時德化流行諸侯卿大夫妻
皆秉德執度有君子之行當時彤諸詠歌傳於後來則
今之世有好德如范夫人者其可無傳乎遂為之表

前山東鹽運副使蕭公妻宜人郭氏墓表

行泰和邑西一舍許曰南溪溪之上故家曰蕭氏蕭之君子曰鵬舉其卒而葬也余銘之後二十有二年鵬舉之配郭宜人卒詹事王君既銘其墓宜人之子鉉在京師又求余為表泰和數十年來語妻道之賢曰郭宜人語母道之賢亦曰郭宜人則余何辭宜人邑篠溪里名家父與恭元萬安主簿富賢產宜人天性柔淑樂澹素而謹飭自持涉學問知其大義歸鵬舉不逮事舅姑而歲時薦祭甚謹忌日必素食鵬舉有弟妹五人待之一

如鵬舉之友愛輟奩具以嫁其妹如己之妹於奉族姻
長者及待下至於臧獲皆適其宜鵬舉仕為蘇州府同
知單身之官持廉介後坐累謫河南宜人鬻產給之而
理其家政井井不隳鵬舉之規也雖時家益落於事必
當義不計利聞陰陽家言舅姑所葬地下濕宜遷馳書
咨鵬舉遷之鵬舉復起為山東鹽運副使廉介如蘇州
而宜人理其家廿有餘年六十有六鵬舉卒二子長金
己出次鑑庶出常均所有於二子衆謂金宜厚宜人曰

子一也何有厚薄然愛鉉好學嘗曰成父志在此兒意
常厚之鉉舉進士歸宜人喜津津見容色三年鉉被召
宜人歎曰吾老矣將不復見汝勉務善德無忝父母此
宜人之篤於妻道母道者也他如教育親戚孤子長而
成其家室又導之奉先之大節蓋其行可書非一享年
八十有八卒於宣德辛亥七月八日子二男三女男即
金鉉女之壻郭仲啟吳世昭巴東縣學教諭彭顥孫男
六欒選中江西鄉貢準困江渭溫曾孫男四嗚呼自孔

孟明義利以垂教士之遵用一世幾何況世逾遠又女婦耶懿郭宜人允配君子有來繁祉垂百世祀

太僕寺丞丁維南妻宜人徐氏墓表

太僕寺丞丁維南妻宜人徐氏之卒而葬也監察御史黃宗載既志而銘之其子侃倬又以父命齎國子助教徐疇所狀行實介刑部主事徐孔竒以來謁拜請表其墓按狀徐世家南昌豐城父與京宜人諱德天資淑惠佩承姆教年二十三歸丁氏丁故邑鉅家同爨常百人

宜人以孝事舅姑而待妯娌及族姻皆得宜其卑且賤者皆樂為之使以是家事無鉅細舅姑悉以屬之而為之有條理維南既出仕為典牧署丞又陞太僕丞有子四男二女宜人留家居教養之男皆遣從明師學維南得盡意於公而無所私累者以宜人主乎內也卒於永樂戊戌四月六日享年六十有二其子男儼侃倬倬侃治書經永樂十年會試中副榜授和州儒學訓導倬亦治進士業其女之壻陳用端周思道孫男三騏鳳驥女

五孔竒為余言丁氏於葬事斥去一切浮靡無益之費
備棺槨之制周密以固合朱氏禮而狀亦云以松脂二
千斤內槨中加炭屑沙土二百石築其外又外固以石
為經久計可謂厚於送終者矣夫亦其有警於流俗歟
比年匡廬西山之間往往盜發塚墓有司恬莫禁戢兵
部盧侍郎葬西山之麓盜發其墓至再雖無所得而體
鬼有不幸者矣夫忍於為是者亦將無天道之應乎則
余之著斯文雖以表宜人而為薄俗者亦可以觀焉

康節婦墓表

洪武十六年江西按察僉事翁師善行部至泰和下車
首問風俗及忠孝節義之焯著者得節婦三人聞于朝
又三年詔悉旌其門復其家三人者康仁安之配陳氏
其一也又四年康節婦春秋七十有二卒陳泰和世醫
家仁可節婦父也節婦諱端自幼秀慧莊重謹姆訓父
母愛之既笄擇所歸以配仁安事舅姑相夫咸盡其道
處娣姒族姻下及臧獲各當其分歸康氏三年舅歿又

二年仁安沒獨奉老姑撫幼子躬勤持家數歲兵亂作
寇環四境獨先舉家走避巖谷不蹈於禍所居屢燬于
兵辛勤屢作之以禮厚自坊所親有利其產而諷之他
適者斷髮誓天示不復有他志孀居垂五十年貞潔之
操如一日孝養姑終其身而卒成其子於善行女德之
大曰婦道妻道母道節婦其可謂兼之矣其卒以洪武
戊辰十一月十八日男子一人德昭父喪始三歲長而
溫厚醇謹明法律郡邑史率師之其存心長者而賤深

文史不直草芥凡讞獄經德昭議多見寬貸或謂之曰
子待樹德耶輒應之曰人奈何不務德哉後節婦卒之
三年亦卒孫男二郁岳女三曾孫男七豫勉頤頤韶頤
顥女八岳洪武丙子貢士累官梁府紀善頤顥皆永樂
庚子貢士頤明年登第賜進士出身殆康氏務德之應
歟固本諸節婦之教哉節婦之事見鄉先生陳心吾述
贊謝子方銘墓余少授徒其里塾嘗升堂拜節婦又相
與德昭父子祖孫者四十年故岳復求余表節婦之墓

太宜人曾氏墓表

太宜人姓曾氏曾之先家南豐初徙盱之楓坑再徙金谿之黃通里世襲儒學有聞人元盛時與臨川處士孫履常齊名朝廷以崇文先生徵不起諱文者太宜人曾祖也鶩湖書院山長諱仍洪武初金谿縣儒學教諭諱易者祖與父也母鄭太宜人諱隆生有令質長益脩其女德父母愛之曰必求佳壻時同邑王脩本從游教諭君力學謹行蘄然出羣輩且家世相望教諭君喜曰佳

壻莫踰此矣遂歸焉孝事舅姑舅沒奉姑敬愛逾篤勤家以相夫夫沒無幾姑沒太宜人年三十子一男二女男英年十二女皆幼太宜人辛苦以禮畢二喪時徭賦頗煩王氏惟藏書千餘卷及有田百畝無他畜貲或導其鬻書與田以給公家者太宜人歎曰此王氏累世所積以遺後人奈何自我棄之不聽而盡鬻其奩具給焉日勉英學問曰其敬嗣爾先人於是家益落又無臧獲之助饔飧井臼悉母子躬任之而太宜人所以持身率

家甚嚴英登第官翰林嘗迎太宜人就祿養者數年英
陞右春坊大學士兼翰林侍講學士得援恩典以已之
散官職事贈父而封母太宜人遂捧誥歸省居兩月太
宜人曰既仕食祿勉思効分寸報國家毋徒久安於私
也英奏分其俸之半給於鄉為養且時時奉所得賜賚
太宜人數以分族姻之貧者自其子官於朝三十年階
四品聲譽奕奕太宜人歸治其家清儉一如布素時而
薦祭必加豐每飭其家人凡賓客之奉及鄉閭慶弔必

如禮而躬督諸孫務學力善曰必無忝而祖父自少至老恒勤女事雖老歲必製精締遣遺其子或曰子豐顯豈少一衣耶曰兒恒憂念母老使知母能是其心安矣年七十有五清明康裕而旦暮績不輟一日微疾端坐而沒宣德七年正月六日也英聞訃奔喪歸上遣中使護送之命禮部賜祭工部營葬事蓋特恩云英自翰林脩譔累進其官今為詹事府少詹事兼翰林侍講學士女長嫁徐洪次嫁許鼎孫男五裕祐祺禎瑞裕舉進士

廣西道監察御史孫女一曾孫男三述遲逝女四太宜人以沒之歲九月乙未葬其邑歸政鄉昔魯有季敬姜文伯母也博達知禮文伯相魯敬姜猶績又明先王之訓以導其子孔子取焉若太宜人非其得於前言往行率而蹈之歟不然何以其持躬導子孫者皆相類也余故表諸其墓

東里文集卷二十一